

لقاء الرئيس محمد أنور السادات

بالصيادين

في ٦ سبتمبر ١٩٨٠

بسم الله

سعدت حقيقة وأنا بأستمع لكم ولأبنائنا اللي اتكلموا الآن وأنا واثق أن شعبكم وأهلكم في مصر حايبقوا سعداء زيي تماماً.. وهم بيستمعوا لكلامكم في التلفزيون.. المعني الجميل الكبير اللي وراء هذا كله انه مصر أصبحت عيلة.. عيلة واحدة.. سعدت قوي لما الشيخ علي قال انه القطاع بتاع الثروة السمكية لازم يقوم بواجبه النهارده علشان عيلة مصر.. علشان المجرمين اللي بيرفعوا الأسعار في اللحوم ومواد التموين الأخرى المعني وراء ده كبير جداً.. كلنا من أسوان لادكو لاسكندرية لبورسعيد لعزبة البرج ودمياط للصعيد كله لقارون.. اتكلمتم وعبرتم عن الشيء.. المغزي الكبير اللي أنا حريص عليه النهاردة وهو انه من أقصى البلد إلي أقصاها بنكون العيلة المصرية اللي كل إنسان فيها بيحس بمتاعب أخوه وبيحس بمصلحة أخوه وبعدين كلنا بنتعاون علشان نبني بناء لأولادنا ولأحفادنا من بعدنا.. مصر عزيزة غالية رشيدة.. أيضاً يستمتع كل واحد فينا بالرخاء.. بالرخاء يحصل علي قوته وقوت أولاده ويسكن ويسعد لأنه بينتمي للأرض التراب المقدس بتاعنا دي مصر اللي ربنا سبحانه وتعالى أنعم علينا كلنا بيها

سعدت أيضاً لأنه يمكن دي أول مرة نجتمع فيها كمؤتمر للصيادين وجه مؤتمرهم في وقت احنا فاتحين فيه معركة علي كل المستغلين.. مش بتوع اللحمة بس لا.. عملية رفع الأسعار في كل السلع.. القرار بتاعي بتاع اللحمة معلوم أنه لا قفوا يا اللي بترفعوا الأسعار في اللحمة وفي غير اللحمة.. ليه؟.. لأنه شعبنا الكبير العريق لازم

يتمتع بالرخاء.. والرخاء أن كل المواد والسلع الغذائية تبقى متوفرة ويبقى يستطيع
يشتريها بسعر مناسب له ولأولاده

بأشكركم علي مشاعركم نحو أهلكم في مصر وأنا واثق أن أهلكم وشعبكم وهم
بيستمعوا لكم النهارده في التلفزيون حايبقوا سعداء جداً.. لأنه زي ما قلت من أقصى
البلد لأقصاها كلنا قاعدين اليوم بنبحث عن شئ واحد.. ازاي نخفض المعاناة عن
الإنسان المصري في الصعيد وفي الشمال وفي الجنوب وفي الشرق وفي الغرب..
المشاكل اللي أنا استمعت لها منكم بلاشك لابد أن تحل وتحل فوراً لأنه ماعدش عندنا
وقت نضيعه في عمل الروتين والأعمال اللي أدت في النهاية إلي أنه انتاجنا يقل..
الإنتاج قل سواء في السلع الغذائية أو السلع المصنعة إنما في الأساس في السلع
الغذائية بالنسبة للنظام المحجف والروتين قل الإنتاج في السلع الغذائية. ده لازم
نتولاه

أنتم بتتولوا الإنتاج في سلعة ضخمة أساسية لأنها بتعوض البروتين بتاع اللحم
البروتين الحيواني وهي الأسماك.. اتكلم بعض الأخوة منكم عن بنك للصياد.. هو
يخيل لي أنه حايبقي مضيعة كبيرة انه بنك يكون للصياد فقط.. ولكن لما فكرت في
تكوين بنك التنمية الوطنية واللي رأسماله ٥٠ مليون جنيهه واندفعت فعلاً ربعها في
التأسيس ويرتفع إلي ١٠٠ مليون الهدف منه هو ده الكلام اللي أنتم النهارده بتقولوه
انه عملية التنمية الوطنية في كل مكان في أنحاء الجمهورية سواء في الصيد.. سواء
في الغذاء.. سواء في الصناعة والمنتجات الصناعية.. سواء في رفاهية الإنسان
وتوفير البيت اللي فيه كل شئ للمواطن العادي علشان يستطيع أن يستمتع بكل شئ
في بيته ويدفع قسط كل ده وراء الهدف من إنشاء هذا البنك اتكلمتم عن شركة معدات
الصيد وأنا في الواقع لا أستطيع أني أدعي أني أعرف سيرها.. ولكن لأول وهلة
احنا فوراً إن شاء الله أنا بأجمع مجلس الوزراء الموسع اللي فيه نواب رئيس
الوزراء الموسع يوم السبت المقبل إن شاء الله.. زي النهارده حاجمعه في القاهرة..

مجلس الوزراء الموسع اللي فيه نواب رئيس الوزراء والوزراء والمحافظين
وحايكون النائب ان شاء الله عاد من رحلته في أوروبا بعد ما عمل المفاوضات مع
كل الدول اللي قرأتم عنها في يوم السبت المقبل إن شاء الله وفي مجلس الوزراء
الموسع كل مشاكلكم اللي سمعتها إن شاء تأخذ طريقها إلي التنفيذ وحاشوف مسألة أنه
هيئة واحدة

بس أنا مش ميال انه يكون هذا الأمر مركزي أنا ميال أن كل محافظ أو كل
الصيادين في كل محافظة المحافظ يتولي كل شئ بالنسبة لكم علشان ما يجوش
القاهرة يحلوا مشاكلكم.. لكن حاشوف ان شاء الله هذا الكلام كله يوم السبت المقبل

وصيتي لكم أنتم النهارده من أبناء العيلة المصرية اللي كوناها والتي كلنا نحس
ببعض. أنتم مسئولين النهارده انكم توفروا لشعبكم ولأهلكم السمك.. وتدخلوا معركة
الأسعار معايا علشان نكسر الجشع والإجرام بتاع رفع الأسعار ونوفر لكل شعبنا
القوت

أنتم مسئولين كأبناء العيلة المصرية انكم تقفوا معايا في هذه المعركة وأنا سعيد من
كل ما سمعته منكم حقيقة أمل يملأني فخر بيكم وفخر بعملكم.. وكل عام إن شاء الله
نلتقي هنا في مثل هذا اليوم في عيد الصيادين علشان نشوف عملنا إيه في السنة
الماضية

علي رأس الحاجات اللي لازم أخلصها لكم إن شاء الله السبت اللي جاي.. شركة
علشان المعدات بتاعتكم مع بنك التنمية الوطني.. أنا عايزكم أنتم جمعياتكم هي اللي
تكون هذه الشركة وحادخل البنك معاكم بمساهمة برأسمال وعملة أجنبية.. علشان
تقدروا تشتروا حاجاتكم.. الشركة عايزها منكم ممثلين في جمعياتكم علشان الشركة
تبقى بتخدمكم وأنتم عارفين أيه دخلها وأيها خرجها.. ما تقعدشي منعزلة في مكان
وأنتم في جميع أنحاء البلد منعزلين عنها.. لا

آن الأوان أنكم أنتم بنفسكم تشرفوا علي شركة الآلات بتاعتكم والبنك يساهم معاكم فيها وبنك التتمية الوطني يوجد لكم الشركة الأساسية اللي طلبتم ان بنك الصياد يقوم بيها لا حا يقوم بيها البنك الوطني.. وحاييقي فرع يساوي تماماً بنك الصياد.. وأكثر لانه بيكون وراءه دعم من رأس مال البنك الكبير اللي هو ٥٠ مليون جنيهه واللي إن شاء الله حاوصل إلي ١٠٠ مليون جنيهه النهارده

بأحييكم وباطلب منكم تتقلوا لأبنائي الصيادين في كل أنحاء الجمهورية حبي وفخري بيكم أنكم في هذه المرحلة بتدخلوا معركة الأسعار علشان الرخاء لشعبكم ولأهلكم بلغوهم.. أبنائي الصيادين في كل أنحاء الجمهورية حبي وتحياتي لهم وفخري بيهم ولا بد أن يستمروا معي ومع الشعب في معركة الأسعار حتي نوفر الرخاء للعيلة المصرية الكبيرة اللي كلنا بنتشرف بأننا ننتسب لها.. ربنا يوفقكم

والسلام عليكم ورحمه الله وبركاته